



Minggu, 24 Desember 2023

Ogen: Lukas 2:14



Dame Isurga Nusur Ku Doni



Dame ni surga, nusur ku doni, ngena ate man manusia..... Bagin KEE No. 178. I je pe kita iajuk muji Dibata si enggo ngelakoken perbahanen si mbelin e. Bage me berita surga nari si ibaba malekat-malekat man permakan-permakan imbalmbal Eprata. La iarap, la lit berita ras tanda-tanda kai pe rempet me tedis malekat i je rikut kerina suasana surga sierbahansa mbiar ras sengget permakan-permakan. La kal pernah idahna, labo sempat iarapkenna kai si reh e jadi iadepenna. Berita si mbelin si ibaba malekat-malekat e tuhu-tuhu luar biasa man bana. Payo la ka ibeligai geluhna, labo iinget dirina tapi ia me si ngaloken berita si mbelin e. Rikut ras si e rende malekat i je nina 'Terpujilah Dibata i bas surga si meganjangna janah dame i doni man manusia si ngena ateNa.' Tuhu surga ras doni enggo jumpa arah ketubuhen Anak Dibata. Dibata ngenca si patut ngaloken pujin, sabap mbelin tuhu IA, erkuasa la saja nandangi doni tinepaNa bage pe surga ingan si rasa lalap.

Kai ulihna ketubuhen Anak Dibata e? Dame me i doni si enggo dem alu dosa ras pelanggaran, geluh si ate-ate, lanai lit ketenengen. Sibuk alu dirina, ngukurken kesenangenna saja, turah perubaten, dendam la tertambari. Kerina erbahan rubat i bas pusuh, la siangkan ras kalak sideban. Tapi berita si ibaba malekat e, dame surga nari nusur ku doni, janah dame e man manusia si ngena ateNa. Permakan kin ngenca ngena ate Dibata? Tentu lang, kerina manusia tinepaNa e ngena ras keleng ateNa. Kuga kita nandai IA ras ngalokenca, e me siperlu si lakoken i bas mperingeti ketubuhen Jesus Anak DIbata i bas perayan natal silakoken kita.

Damelah kita, erdame ras Dibata bage pe temanta manusia. Enggo sialoken erdamen i bas Dibata nari e maka erdamelah kita, sibaba, sisehken, sielaken dame e. Terpujilah Dibata.